

Ku dhaqan Xafiis D.

FAAFINTA

الرسمية

OFFICIAL



RASMIGA AH

الجريدة

BULLETIN

EE JAMHUURIYADDA SOOMAALIYA

Sanadka 12aad

Muqdisho, 21 DECEMBER 2025

Lr.3

Waaxda Maamulka Faafinta Rasmiga ah
Ee Xafiiska Garyaqaanka Guud ee Dawladda

FAAFIN BIL SOO BAXA

Qiimaha waa \$XXX Dollar, lambar waliba – **RUKUNKA:** Sanaddii waa \$XXX Dollar, Soomaaliya gudaheeda – Dibaddeedana waa \$XXX Dollar.

Rukunka la weydiisto waqtiga loo gooyay wuxuu ka bilaabmaa 1 Janaayo. Qiimaha Qoritaanku F.R halkii sadar iyo wixii ka yar waa \$XXX Dollar – Rukunka iyo Qoritaanku waxaa la weydiistaa Laanta Maamulka Faafinta Rasmiga ah – Lacagta waxaa lagu bixiniyaa Xafiiska Canshuuraha ee Wasaaradda Maaliyadda.

KOBNIIN

BOGGA KOOWAAD

SHARCI

W.M

BOGGA LABAAD

XEER

BOGGA SEDDEXAAD

TALOOYIN, ISGAARSIIN, OGAYSIIS, IWM

BILAHA

JULY-DECEMBER

2025



The Federal Republic of Somalia
Office of the Prime Minister

Xeer Ra'iisul Wasaare Lr.185

Taariikh: 02 Sep, 2025

**XEERKA: XEER-NIDAAMIYAHA HABRAACA U QEYBSANAYAASHA
ARRIMAHA DIFAACA.**



Ra'iisul Wasaaraha Xukuumadda JFS;

Markuu arkay: Qodobka 97^{aad} farqadaha 1^{aad} iyo 2^{aad}, iyo Qodobka 99^{aad} farqadaha (a), (b), (e), (f) iyo (i); iyo Qodobka 100^{aad} farqadaha (a) iyo (d) ee Dastuurka KMG.

Markuu arkay: Warqadda summaddeedu tahay **WG/XM/0291/08/25** ee ku taariikheysan **20/08/2025** ee Wasaaradda Gaashaandhigga kuna saabsan codsiga soojeedinta **Xeer-nidaamiyaha Habraaca u Qeybsanayaasha Arrimaha Difaaca;**

Markuu arkay: Go'aanka Shirka Golaha Wasiirrada ee summaddiisu tahay **SHGW.25.128.08.25** ee **28/08/2025**, kuna saabsan **Ansixinta Xeer-nidaamiyaha Habraaca u Qeybsanayaasha Arrimaha Difaaca** oo uu Goluhu cod buuxa ku ansixiyay;

Markuu tixgeliyay: Muhiimadda Xeer-nidaamiyahan u leeyahay xoojinta hannaanka isla-xisaabtanka, iyo daahfurnaanta shaqada u qaybsanayaasha arrimaha difaaca.

Wuxuu Meelmariyay

Qodobka 1^{aad}

Go'aan Gole

Go'aanka Shirka Golaha Wasiirrada ee summaddiisu tahay **SHGW.25.128.08.25** ee **28/08/2025**, kuna saabsan ansixinta **Xeer-nidaamiyaha Habraaca u Qeybsanayaasha Arrimaha Difaaca** oo uu Goluhu cod buuxa ku ansixiyay.

Qodobka 2^{aad}

Hirgalin

Waxaa Wasaaradda Gaashaandhigga loo igmaday in ay hirgaliso meelmarisana Xeer-nidaamiyahan.

Qodobka 3^{aad}

Dhaqangal

Xeer-nidaamiyahan waxaa uu dhaqangalayaa marka uu saxiixo Ra'iisul Wasaaraha Xukuumadda Jamhuuriyadda Federaalka Soomaaliya, waxaana lagu soo saarayaa faafinta Rasmiga ah ee Dowladda.



JAMHUURIYADDA FEDERAALKA SOOMAALIYA	
XAFIISKA HANTIDHOWRKA GUUD	
DIIRWAAN NO:	HAAN-060-2022
TAARIIXH	29-09-2022
SAXIIX	
AVV Ahmed Isse Guure	
Hantidhowraha Guud ee JFS	



Mudane, Saalax Axmed Jaamac

Kusimaha Ra'iisul Wasaaraha, ahna Ra'iisul Wasaare kuxigeenka Xukuumadda JFS

**JAMHUURIYADDA FEDERAALKA SOOMAALIYA
WASAARADDA GAASHAANDHIGGA**



**Habraaca U Qeybsanayaasha Arrimaha Difaaca (Defense
Attachés) ee Wasaaradda Gaashaandhigga**

Luulyo 2025

Tusmada Habraaca

TUSMADA HABRAACA	1
HORDHAC	2
QODOBKA 1AAD: XILKA IYO MAS’UULIYADAHA U QEYBSANAAYAASHA ARRIMAHA DIFAACA	2
QODOBKA 2AAD: HANNAANKA XULASHADA IYO MAGACAABISTA.....	5
QODOBKA 3AAD: KORMEER IYO KORJOOGTAYN	6
QODOBKA 4AAD: MUDDADA XIL-HAYNTA	8
QODOBKA 5AAD: SABABAHA XILKA LAGU WAAYI KARO.....	9
QODOBKA 6AAD: WADA SHAQEYNTA.....	9
QODOBKA 7AAD: DHAQAN-GAL.....	10

Hordhac

Habraacani waxa uu dejinayaa tilmaamaha guud ee ku saabsan xilka, mas’uuliyadaha, iyo hannaanka magacaabista u qeybsanayaasha arrimaha difaaca (defense attachés) ee Jamhuuriyadda Federaalka Soomaaliya. Ujeeddadu waa in la xaqiijiyo matalaad ciidan oo xirfadeysan, waxtar leh, kana tarjumaysa danaha qaranka ee arrimaha difaaca, iyadoo lagu saleynayo **Xeer Madaxweyne LR.238** ee soo baxay **1da Luulyo 2024**.

Qodobka 1aad: Xilka Iyo Mas’uuliyadaha U Qeybsanaayaasha Arrimaha Difaaca

U qeybsanaha arrimaha difaacu waa wakiilka Wasaaradda Gaashaandhigga ee safaaradda Jamhuuriyadda Federaalka Soomaaliya ku leedahay dal kale.

Waajibaadka u qeybsanaha arrimaha difaaca waxaa ka mid ah:

1. Matalaadda Rasmiga ah ee Jamhuuriyadda Federaalka Soomaaliya ee Arrimaha Difaaca

U qeybsanaha arrimaha difaacu waa wakiilka rasmiga ah ee Jamhuuriyadda Federaalka Soomaaliya ugu qaabilsan arrimaha difaaca ee dalka/dalalka loo magacaabay. Matalaaddan waxa ay ku salaysan tahay ilaalinta danaha qaranka ee dhinacyada difaaca, xiriirka diblomaasiyadeed iyo iskaashiga ciidan ee labada dhinac.

2. Xoojinta iskaashiga difaac ee u dhexeeya dalka/dalalka u qeybsanaha arrimaha difaacu uu wakiilka uga yahay Soomaaliya

Hawshani waxay safka hore uga jirtaa waajibaadka iyo xilka u qeybsanaha, maadaama curfiga dowliga ah ee xilligan uu ku salaysanyahay furfurnaan, isbaheysiyo iyo horumar tiknoolajiyadeed taas oo u baahan iskaashi si loo ilaaliyo ammaanka qaranka, kan gobolka iyo midka caalamiga ahba.

Si loo xoojiyo xiriirka iskaashiga ee dhanka difaaca, u qeybsanuhu waa in uu ku guto gudashada waajibaadka iyo xilka saaran qaababka soo socda:

- a) Gudashada waajibaadka iyo mas’uuliyadaha ay u xilsaartay Wasaaradda Gaashaandhiggu.
- b) Hindisaha iyo hal-abuurka shaqsiga ah ee u qeybsanaha isagoo ka faa’iidaysanaya xiriirka uu la leeyahay hay’adaha dalka/dalalka uu wakiilka nooga yahay.
- c) Codsiga ka yimaada dalka/dalalka uu wakiilka nooga yahay kaas oo danaynaya horumarinta iskaashi dhinaca difaaca ah oo uu la yeesho Soomaaliya.
- d) Kartida, aqoonta iyo waayo-aragnimada u qeybsanuhu waxay muhiim u tahay horumarinta iskaashiga difaac ee labada dal.

3. Dhisidda kalsoonida iyo horumarinta xiriirka wada shaqayneed

U qeybsanaha Arrimaha Difaacu isaga oo la kaashanaya Wasaaradda Gaashaandhigga una maraya hannaanka diblomaasiyadeed ee caalamiga ah ee la isla aqoonsanyahay waa in uu dhisaa kalsooni dhanka iskaashiga difaaca ah oo dhex marta labada dal isla markaana uu abuurso jawi saaxiibtinimo iyo wada shaqeyn u horseedda labada dal in ay isdhaafsadaan booqashooyin, xiriir joogta ah iyo iskaashi dhanka difaaca ah.

U qeybsanaha arrimaha difaacu waa in uu dhisidda kalsoonida iyo horumarinta xiriirka wada shaqayneed ee labada dal u maraa hababka diblomaasiyadeed ee soo socda:

- a) La socoshada munaasabadaha qaran iyo ciidan ee dalka/dalalka uu wakiilka uga yahay Soomaaliya iyo ku wargelintooda Wasaaradda Gaashaandhigga si loo go'aamiyo heerka ka qeybgalka munaasabadahaas.
- b) La socoshada saamaynta musiibooyinka dabiiciga ah iyo kuwa kale ee ka dhaca dalka/dalalka uu wakiilka uga yahay Soomaaliya iyo ku wargelintooda Wasaaradda Gaashaandhigga si Jamhuuriyadda Federaalka Soomaaliya uga qeyb qaadatao gacanna uga gaysato gurmada iyo gargaarka dadka ay musiibooyinku saameeyeen.
- c) Qaban-qaabinta isdhaafsiga booqashooyin rasmi ah oo heerkoodu sarreeyo oo dhex mara hay'adaha difaaca ee labada dal.
- d) Isdhaafsiga haddiyado-sharafeed dhexmara u qeybsanaha iyo saraakiisha difaaca ee dalka/dalalka uu wakiilka uga yahay Soomaaliya xilliyada munaasabadaha qaran iyo ciidan ee labada dhinac.
- e) Waa in uu si heerkeedu aad u sarreeyo u ilaaliyo xogta nooc kasta oo iskaashi iyo wada shaqeyn ee dhexmarta Soomaaliya iyo dalka/dalalka uu wakiilka uga yahay si aysan sirtaasi ugu gacan gelin dhinacyo ka faa'iidayaan kara ama dhaawici kara xiriirka iskaashiga difaaca ee Soomaaliya iyo dalkaas/dalalkaas.

4. Isku-duwidda iskaashiga difaac ee Soomaaliya iyo dalka/dalalka kale

In kasta oo aan iskaashi difaac walbaa uusan ahayn isbahaysi ciidan ilaa uu maro marxalado kala duwan oo siyaasadeed haddana waxa uu muhiim u yahay xiriirka dalalka uu dhexmarayo si ay isu dhaafsadaan ugana wada shaqeeyaan danaha difaac ee ay wadaagi karaan.

U qeybsanaha arrimaha difaacu waa inuu faham qoto-dheer u yeeshaa danaha dalka/dalalka uu wakiilka uga yahay Soomaaliya isaga oo mar kasta maskaxda ku haynaya danaha Jamhuuriyadda Federaalka Soomaaliya iyo awoodaha dalkeenna.

Arrimaha muhiimka u ah hirgelinta isku-duwidda iskaashiga difaac ee Soomaaliya iyo dalka/dalalka kale waxaa ka mid ah:

- a) Isku-dubbaridka dhoolla-tusyo ciidan oo wadajir ah sida qorshaynta dagaalka, adeegsiga gaadiidka dagaalka iyo hubka, xeeladaha fagaarayaasha dagaalka, barta hoggaaminta, xeeladaha weerarka, difaaca iyo wada-howlgalka ciidammada dhulka, cirka iyo badda ee labada dal.
- b) Dhiirri gelinta isdhaafsiga tababarrada, aqoonta iyo waayo-aragnimada ciidan ee labada dhinac.
- c) Kobcinta iskaashiga dhinacyada hubka, saanadda, agabka, qalabka iyo tiknoolajiyadda difaac ee casriga ah ee labada dal.
- d) Isku-duwidda taageerada iyo deeqaha ciidan ee dalka/dalalka uu wakiilka nooga yahay (si gaar ah u qeybsanayaasha arrimaha difaaca ee Soomaaliya wakiilka uga ah dalalka hodanka ah).
- e) U qeybsanaha arrimaha difaacu waa in uu si heerkeedu sarreeyo u dhiso xiriirka iskaashiga difaac ee labada dhinac isaga oo ku saleynaya xiriirka diblomaasiyadeed ee labada dal. Heshiisyada difaaca waxaa isla gaara oo go'aamiya madaxda labada dal halka u qeybsanaha arrimaha difaacu uu yahay xiriiriyaha iyo isku-duwaha ugu muhiimsan isaga oo la kaashanaya Danjiraha Soomaaliya u fadhiya dalka/dalalka uu wakiilka nooga yahay.

5. Xog-ururinta iyo wargelinta joogtada ah ee Wasaaradda Gaashaandhigga.

Mid ka mid ah waajibaadka ugu muhiimsan ee saaran u qeybsanaha arrimaha difaacu waa ururinta xogaha difaac iyo amni ee dalka/dalalka uu wakiilka uga Soomaaliya. Arrintan waxaa dammaanad qaadaya **qodobka 41aad ee Heshiiska Vienna ee xiriirrada diblomaasiyadeed ee 1961kii**.

Ururinta xogtu waxay muhiim u tahay qiimaynta xaaladaha siyaasadeed, difaac iyo amni iyo go'aan qaadashada saxda ah ee madaxda dalka xilliga ku habboon.

Sidaas darteed, u qeybsanaha arrimaha difaacu waa in uu si xeel dheer u maareeyaa ururinta xogta iyo ilaalinta sirta isaga oo adeegsanaya xasaanaddiisa diblomaasiyadeed.

6. Fulinta tilmaamaha iyo amarrada Wasiirka Gaashaandhigga.

U qeybsanaha arrimaha difaacu waa in uu si buuxda u fuliyaa tilmaamaha iyo amarrada ka soo baxa Wasiirka Gaashaandhigga ee la xiriira matalaadda Jamhuuriyadda Federaalka Soomaaliya ee dhinaca difaaca. Fulinta waajibaadkan waxaa ka mid ah:

- a) Fulinta siyaasadda iyo istaraatiijiyadda Wasaaradda ee la xiriira horumarinta iskaashiga difaaca.
- b) Hubinta tallaabo kasta ee uu qaadayo in ay waafaqsan tilmaamaha Wasiirka iyo danaha qaranka.

- c) In uu si degdeg ah uga jawaabo dalabyada Wasiirka ee la xiriira xaaladaha degdegga ah.

Qodobka 2aad: Hannaanka Xulashada iyo Magacaabista

1. Shuruudaha Laga Rabo:

- a) In uu yahay sarkaal ciidan oo sare (ugu yaraan Heerka Gaashaanle Sare iyo wixii ka sarreeya).
- b) In uu khibrad u leeyahay arrimaha diblomaasiyadda, ciidanka, amniga gobolka iyo xiriirka caalamiga ah. Sidoo kale, waa in uu ku hadlaa luuqadda rasmiga ah ee dalka/dalalka uu wakiilka nooga yahay iyo/ama mid ka mid ah luuqadaha caalamiga ah (Ingiriis, Carabi iwm).
- c) In uu haysto shahaado jaamacadeed ugu yaraan heerka koowaad (Bachelor Degree).
- d) In uu ka baxay akadeemiyo ciidan (staff college) iyo wixii ka sarreeya.
- e) In uu leeyahay ugu yaraan shan (5) sano oo waaya-aragnimo hoggaamin ciidan ah.
- f) In uu haysto hubin heerkeedu sarreeyo oo ay bixiyeen guddi ay ku midaysanyihiin Wasaaradda Gaashaandhigga iyo Taliska CXD.
- g) In uu leeyahay xirfad, karti, xilkasnimo iyo anshax suubban (dishibiliin), ilaaliyana xogaha ciidan una hoggaansamo siyaasadda difaaca qaranka.

2. Habraaca Magacaabista:

- a) Wasaaradda Gaashaandhigga ayaa go'aaminaysa baahida magacaabis.
- b) Wasiirka Gaashaandhigga ama cidada uu u xilsaarto ayaa xaqiijinaysa in u qeybsanaha arrimaha difaaca uu buuxiyay shuruudaha ku xusan qodobka labaad, farqadiisa koowaad ee habraacan.
- c) Wasiirka Gaashaandhigga ayaa hubinaya in u qeybsanuhu uu qaato tababarro la xiriira arrimaha difaaca iyo hawlaha diblomaasiyadda.
- d) Wasiirka Gaashaandhigga ayaa magacaabaya ama xilka ka qaadaya u qeybsanaha arrimaha difaaca sida ku cad **Xeer Madaxweyne LR.238**.
- e) Wasiirka Gaashaandhigga waxa uu u magacaabayaa dalalka/dalalka iskaashiga difaac ee xooggan uu kala dhaxeeyo Soomaaliya ku xigeenka u qeybsanaha arrimaha difaaca haddii/markii loo baahdo.
- f) Waddammada aan xiriir difaac oo toos ahi kala dhaxeynin Soomaaliya ama aysan jirin baahi loogu magacaabo u qeybsane difaac, waxaa Soomaaliya ku matalaya u qeybsanaha difaac ee wakiilka nooga ah dal deris la ah dalkaas (Non-resident Defense Attachés).
- g) Qeybta Xiriirka Dibadda iyo U Qeybsanayaasha ee Wasaaradda Gaashaandhigga ayaa la socodsiinaysa Wasaaradda Arrimaha Dibadda magacaabista u qeybsanaha si ay ugu gudbisgo dalka loo magacaabay.

Qodobka 3aad: Kormeer iyo Korjoogtayn

1. U qeybsanaha arrimaha difaaca waxaa waajib ku ah diyaarinta warbixinno kala duwan isaga oo u gudbinaya Wasaaradda Gaashaandhigga una soo marsiinaya Qeybta Xiriirka Dibadda iyo U Qeybsanayaasha.
2. Noocyada warbixinnada sida joogtada ah looga rabo u qeybsanuhu waxay kala yihiin:

a) Warbixinno Muddaysan:

- **Warbixin Maalinle ah:** Haddii loo baahdo, u qeybsanuhu waxa uu warbixin maalinle ah oo la xiriirta xaaladda dalka/dalalka uu nagu matalo u soo gudbinayaa Wasiirka Gaashaandhigga Jamhuuriyadda Federaalka Soomaaliya (JFS).
- **Warbixin Toddobaadle ah:** Haddii loo baahdo, u qeybsanuhu waxa uu warbixin toddobaadle ah oo la xiriirta xaaladaha amniga iyo difaaca u soo gudbinayaa Wasiirka Gaashaandhigga JFS.
- **Warbixin Bille ah:** U qeybsanuhu waxa uu warbixin bille ah oo la xiriirta waxqabadkiisa iyo xaaladaha difaac iyo amni ee dalka/dalalka uu ku matalo Soomaaliya u soo gudbinayaa Wasiirka Gaashaandhigga JFS.
- **Warbixin Saddex Biloodle ah:** U qeybsanuhu waxa uu warbixin saddex biloodle ah oo uu ku faahfaahinayo xaaladaha istiraatiijiga ah ee dalka/dalalka uu ku matalo Soomaaliya u soo gudbinayaa Wasiirka Gaashaandhigga JFS.

b) Warbixinno Dhacdooyin La Xiriira:

- **Dhismaha Ciidan:** U qeybsanuhu waxa uu u soo gudbinayaa Wasiirka Gaashaandhigga JFS warbixin la xiriirta taariikhda iyo qaab-dhismeedka ciidan ee dalka/dalalka uu wakiilka uga yahay Soomaaliya.
- **Munaasabadaha Qaran iyo Ciidan:** U qeybsanuhu waxa uu u ku soo wargelinayaa Wasiirka Gaashaandhigga JFS warbixin la xiriirta munaasabadaha qaran iyo ciidan ee dalka/dalalka uu wakiilka uga yahay Soomaaliya.
- **Dhoola-tusyada Ciidan:** U qeybsanuhu waxa uu u soo gudbinayaa Wasiirka Gaashaandhigga JFS warbixinnada la xiriira dhoola-tusyada ciidan ee ka dhaca dalka/dalalka uu wakiilka uga yahay Soomaaliya.
- **Isbedellada Siyaasadeed:** U qeybsanuhu waxa uu u soo gudbinayaa Wasiirka Gaashaandhigga JFS warbixinno la xiriira isbedellada siyaasadeed ee saamaynaya difaaca, amniga iyo ciidanka dalka/dalalka uu wakiilka uga yahay Soomaaliya.
- **Dhacdooyinka Amni ama Iska-hor-imaadyada Hubeysan:** U qeybsanuhu waxa uu u soo gudbinayaa Wasiirka Gaashaandhigga JFS

warbixinno la xiriira dhacdooyinka amni iyo iska-hor-imaadyada hubaysan ee ka dhaca dalka/dalalka uu wakiilka uga yahay Soomaaliya.

- **Magacaabista Mas'uuliyiinta Sare ee Difaaca:** U qeybsanuhu waxa uu u soo gudbinayaa Wasiirka Gaashaandhigga JFS warbixinno la xiriira magacaabista, xil ka qaadista iyo isku shaandhaynta mas'uuliyiinta xilalka sare ee hay'adaha difaaca dalka/dalalka uu wakiilka uga yahay Soomaaliya.

c) Warbixinno Gaar ah:

- **Qiimeynta Awoodda Difaac:** U qeybsanuhu waxa uu u soo gudbinayaa Wasiirka Gaashaandhigga JFS warbixin la xiriirta qiimeynta awoodda ciidan ee dalka/dalalka uu wakiilka uga yahay Soomaaliya.
 - **Dib-U-Habeynta Hay'adaha Difaac:** U qeybsanuhu waxa uu u soo gudbinayaa Wasiirka Gaashaandhigga JFS warbixinno la xiriira hawlaha dib-u-habayn kasta oo lagu sameeyo hay'adaha difaac ee dalka/dalalka uu wakiilka uga yahay Soomaaliya.
 - **Qorshayaasha Iibka:** U qeybsanuhu waxa uu u soo gudbinayaa Wasiirka Gaashaandhigga JFS warbixinno la xiriira qorshayaasha iibka hubka, rasaasta, agabka iyo qalabka ciidan ee Wasaaradda Difaaca ee dalka/dalalka uu wakiilka uga yahay Soomaaliya.
 - **Iskaashi Ciidan:** U qeybsanuhu waxa uu u soo gudbinayaa Wasiirka Gaashaandhigga JFS warbixinno la xiriira is-afgaradyada iyo heshiisyada iskaashi ee dalka/dalalka uu wakiilka uga yahay Soomaaliya la galo dal/dalal kale.
 - **Dhaqdhaqaaqyada Ciidan:** U qeybsanuhu waxa uu u soo gudbinayaa Wasiirka Gaashaandhigga JFS warbixinno la xiriira dhaqdhaqaaqyada ciidan ee gudaha dalka/dalalka uu wakiilka uga yahay Soomaaliya.
3. Warbixinnada uu diyaariyo u qeybsanuhu waxay isugu jirayaan warbixinno **Sir Culus** ah oo u gaar ah si toos ahna uu ugu soo dirayo Wasiirka Gaashaandhigga iyo warbixinnada kale oo uu soo marsiinayo Qeybta Xiriirka Dibadda iyo U Qeybsanayaasha.
 4. Warbixinada sirta ah ee u qeybsanuhu diyaariyo waa in lagu asateeyo erayga sir culus laguna soo diro **Kolayga Diblomaasiyadda** (Diplomatic Pouch or Courier). Qoraal Sir Culus ah laguma soo diri karo shabakadda internet-ka.
 5. Warbixinnada sirta ah isla markaasna degdegta ah oo uusan u qeybsanuhu la sugi karin in uu ku soo diro Kolayga Diblomaasiyadda (Diplomatic Pouch or Courier), waa in loo helaa shabakad isgaarsiineed oo toos ah la iskuna halleyn karo oo uu kula wadaago Wasiirka Gaashaandhigga.
 6. U qeybsanuhu waxa uu sidoo kale warbixinnada sirta ah ku gudbin karaa kulammo fool-ka-fool ah oo uu la yeesho Wasiirka Gaashaandhigga JFS.

7. U qeybsanaha arrimaha difaacu lama wadaagi karo qoraallada sirta ah iyo nuqulladooda cid aan ahayn Wasaaradda Gaashaandhigga.
8. Xogta iyo warbixinnadda u qeybsanayaasha arrimaha difaacu u soo gudbiyaan Wasaaradda waxaa si aad u xafidan loogu keydinayaa Qeybta Boostada iyo Xusuus-dhowrka ee Wasaaradda Gaashaandhigga ama meeshii kale ee si rasmi ah loogu asteeyo.
9. Warbixinnada sida gaarka ah u khuseeya Taliska CXDS, iyadoo loo soo marsiinayo xafiisyada u xilsaaran waxaa si toos ah loogu soo gudbinayaa Xafiiska Taliyaha.
10. Qeybta Xiriirka Dibadda iyo U Qeybsanayaasha ee Wasaaradda Gaashaandhigga ayaa kormeer iyo korjoogtayn ku samaynaysa u qeybsanayaasha arrimaha difaaca.
11. Qeybta Xiriirka Dibadda iyo U Qeybsanayaasha ee Wasaaradda Gaashaandhigga ayaa qiimeyn sanadle ah ku samayn doonta u qeybsanayaasha arrimaha difaaca.

Qodobka 4aad: Muddada Xil-Haynta

1. U qeybsanaha arrimaha difaaca lagama beddeli karo dalka/dalalka uu wakiilka uga yahay Soomaaliya isaga oo aan dhammaysan laba sanadood (2) oo ka bilaabata maalinta uu xilka la wareego, haddii aan waajibaad kale oo qaran loogu baahan.
2. U qeybsanuhu kuma nagaan karo dalka/dalalka uu ku matalo Soomaaliya wax ka badan hal xilli oo afar (4) sano ah.
3. U qeybsanuhu ma hayn karo xilka matalaadda wakiilnimo ee arrimaha difaaca wax ka badan laba xilli oo ah siddeed sanadood (8) oo xiriir ah.
4. Ka dib marka uu soo dhameysto matalaadda wakiilnimo, u qeybsanuhu waa in uu ka hawl galaa xarunta dhexe ee Wasaaradda Gaashaandhigga ama Taliska CXD ugu yaraan laba (2) sanadood oo xiriir ah.
5. U qeybsanaha soo dhameysta waajibaadka matalaadda wakiilnimo, wuxuu ka qaban karaa Wasaaradda Gaashaandhigga xil maamul oo sare sida Xoghayaha Joogtada ah, Agaasimaha Guud, Agaasime Waaxeed ama xilkii kale ee uu Wasiirku u magacaabo.
6. Iyadoo la tixraacayo Habraaca U Qeybsanayaasha Arrimaha Difaaca, Guddi sare oo uu hoggaaminayo Xoghayaha Joogtada ah ayaa qiimeyn ku samaynaya xil gudashada u qeybsanaha arrimaha difaaca, warbixinna u soo gudbinaya Wasiirka Gaashaandhigga.
7. U qeybsane kasta oo guddiga sare ee qiimeyntu caddeeyaan in waxqabadkiisu ka hooseeyo heerkii looga baahnaa labada sano ee hore, waxaa laga qaadayaa xilka matalaadda wakiilnimo waxaana lagu soo celinayaa dalka.
8. U qeybsane kasta oo laga beddelayo dalka/dalalka uu ku matalo Soomaaliya ama xilka laga qaadayo waa in lagu wargeliyaa laba (2) bilood ka hor.

Qodobka 5aad: Sababaha Xilka Lagu Waayi Karo

1. Faafinta qoraallo/xogo la xiriira hawlaha loo wakiishay ama kuwa Wasaaradda Gaashaandhigga. Sidoo kale, qabashada war-saxaafadeed isaga oo aan haysan oggolaanshaha Wasiirka Gaashaandhigga.
2. Faafinta warbixin sir ah ee uu ku helay maqaamka xilkiisa rasmiga ah taas oo uu la wadaagay cid aan ahayn Wasaaradda Gaashaandhigga.
3. U qeybsanaha arrimaha difaaca oo ku kaca falal dhaawici kara xiriirka Soomaaliya iyo dalka/dalalka uu wakiilka nooga yahay.
4. Dalka/dalalka uu wakiilka nooga yahay u qeybsanaha Arrimaha Difaacu oo ka xayuubiya heybadda diblomaasiyadeed (Persona Non Grata).
5. Xil-gudasho la'aan.
6. Khiyaano qaran.
7. Musuq-maasuq.
8. Anshax-xumo diblomaasiyadeed.
9. Gaaritaanka da'da hawl-gabka.
10. Xanuun dhanka maskaxda/dhimirka ah.
11. Mudadda xil-hayntiisa oo dhammaata.
12. Iscasilaad.
13. Dhimasho.

Qodobka 6aad: Wada Shaqeynta

1. Madaxa ergada diblomaasiyadeed ee Soomaaliya ee dalka/dalalka uu wakiilka nooga yahay u qeybsanaha arrimaha difaacu waa Danjiraha Soomaaliya u fadhiya dalkaas.
2. U qeybsanaha arrimaha difaacu waa diblomaasi sare oo ka tirsan safaaradda Soomaaliya ee dalka/dalalka uu wakiilka nooga yahay oo hab-maamuus ahaan istaagaya maqaamka danjiraha ku xiga, hase yeeshee aan qaadan karin go'aanno diblomaasiyadeed oo uusan kala tashan Madaxa Ergada Safaaradda JFS.
3. U qeybsanaha arrimaha difaacu waa diblomaasi sare oo ka tirsan safaaradda Soomaaliya ee dalka/dalalka uu wakiilka nooga yahay isla markaasna u madaxbannaan gudashada hawlaha ay u igmatay Wasaaradda Gaashaandhigga JFS isaga oo hawl-maalmeedkiisana la socodsiiyaa Madaxa Ergada.
4. U qeybsanaha arrimaha difaacu ma qaban karo jagada ku-simaha marka uu maqan yahay Madaxa Ergadu mana fara gashan karo arrimaha maamul ee safaaradda JFS ee dalka/dalalka uu wakiilka nooga yahay.
5. Haddii uu yimaado khilaaf ama isfaham darro u dhaxeysa u qeybsanaha arrimaha difaaca iyo Diblomaasiyiinta kale ee Safaaradda, waxaa lagu xallinayaa wadahadal dhexmara labada dhinac iyadoo Wasaaradda Gaashaandhigga iyo Wasaaradda Arrimaha Dibadda lagu wargelinayo haddii/markii loo baahdo.
6. U qeybsanaha arrimaha difaacu ma geli karo safar, kamana maqnaan karo goobtiisa shaqo isaga oo aan oggolaansho qoraal ah ka haysan Wasaaradda Gaashaandhigga.

7. Kulan kasta oo uu u qeybsanaha arrimaha difaacu la yeelanayo mas'uuliyiinta hay'adaha amniga iyo difaaca ee dalka/dalalka uu wakiilka uga yahay Soomaaliya waa in uu kulanka ka hor ku soo wargeliyaa Wasaaradda Gaashaandhigga JFS.
8. Sidoo kale, kulan kasta oo uu u qeybsanaha arrimaha difaacu la yeelanayo u qeybsanayaasha arrimaha difaaca ee dalalka shisheeye u fadhiya dalka/dalalka uu wakiilka uga yahay Soomaaliya waa in uu kulanka ka hor ku soo wargeliyaa Wasaaradda Gaashaandhigga JFS.
9. U qeybsanaha arrimaha difaacu waa xubin ka tirsan hawl-wadeennada Wasaaradda Gaashaandhigga. Xuquuqdiisa iyo fasaxyadiisa waxaa loo maaraynayaa si waafaqsan Sharciga Shaqaalaha Rayidka ah ee Dawladda Federaalka Soomaaliya.

Qodobka 7aad: Dhaqan-Gal

1. Habraacani wuxuu dhaqan gelayaa marka uu meel mariyo Golaha Wasiirrada ee Jamhuuriyadda Federaalka Soomaaliya.
2. Habraacani marka uu dhaqan galo waxaa reebban in lagu dhaqmo dukumiinti kasta oo kale oo ka hor imaanaya habraacan.